



Uunga siunnersuut: Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allangortinneqarnera pillugu inatsit nr. x ulloq xx. 2021-imeersoq. (Erseqqissaaneq nipilersornermik inuussutissarsiutinut aamma filmiliornermi inuussutissarsiutinut tunngatillugu)

Inuussutissarsiornermut Niuernermullu Naalackersuisoq

Siullermeernera

Naalackersuisut sinnerlugit Inuussutissarsiornermut Niuernermullu Naalackersuisup saqqummiuppaa Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allangortinneqarnissaanut siunnersuut. Taannalu nalilersorluareerlugu Naleqqamiit imatut oqaaseqaateqarfigissavarput.

Siunnersuut uani inatsisartut inatsisaata allangortinneqarnissaanik imalik aallaaveqarpoq Upernaakkut 2020-imi ataatsimiinnermi immikkoortoq 87 Aqqalu Jerimiassen-ip, Atassummit siunnersuutaa ammerlanerussuteqartuniit tapersorsorneqarneranik aallaaveqartoq.

2020-imi Inatsisartut aalajangiineranni Naalackersuisut inatsisissamik siunnersuuteqassasut Nunami inuussutissarsiutinut tunngatillugu inuussutissarsiornermik siuarsaaneq pillugu inatsimmi § 2-imi ilanngunneqassasoq oqaatsit “nipilersornermik inuussutissarsiutit aamma filmiliornermik inuussutissarsiutit.”

Naleqqamiit nuannaarutigaarput kiisami taamatut inatsisissamik suliaqarluni naleqqussaasoqarmat, tassami inuiaqatigiinni kulturikkut pisoorsuuvugut siamasissumik inissisimaffiusumik Nipilersornikkut filmiliornikkullu periarfissat inerisaqqinneranni qularnanngitsumik inuussutissarsiugitigivillugu inissisimalernissaa uagutaaq upperiuarsimavarput periarfissaqartoq piginnaanilissuarnik nunatsinni inuppassuarnik piginnaanilinnik peqaratta.



Nunatsinni kulturikkut pisuussutigisatta aningaasarsiornikkut ineriartortitsinikkut aammalu nunarsuarmioqatitsinnut niueqatigiinnikkut pitsaanerusumik inissisimaannaratik pitsaanerusumik periarfissaqarnissaat Naleqqamiit pingaartitarilluinnakkatta ilagaat.

Nipilersornermik aammalu filmiliornermik inuussutissarsiutit taamatut inatsisitigut aaqqiivigineqarnerat Naleqqamiit alloriarnertut isigaarput Kalaallit Nunatsinni nipilersortartut filmiliorartullu inuussutissarsiutigalugulu inatsisitigut inuussutissarsiutit allatuulli isigisaalluni aaqqiiffigineqarnera alloriarneruvoq pitsaasoq, nipilersortartunut filmiliorartunullu iluaqutaasussaasoq neriuutigilluinnarparput.

Taamatut oqaaseqarluta inatsisissatut siunnersuut tapersorsorparput nipilersortartunik filimiliorartunillu Naleqqamiit aamma tapersersuisartuugatta.